

## ABIGAIL (I Samuel 25).

### **Kan-dike Talatchengani:**

Abigail saksa namen nitobegipa aro namen gisik matsramgipa chanchie jekoba dakna changgipa me-chik ong-a. Anga Toe Skiani odhai 31-ko poraie ia Abigailni gimin poraion Solomonni agangipa me-chikni gunrangko Abigailni janggi tanganio ma-gape nika. Ua segipani gisik grie nokdangko gimaatgnioniko jokatna gisik senge dakaha aro ua bon-kamaode bilakbegipa aro Isolni jakkalako man-gipa Daud rajani jikgipa ong-skaaha. Uni janggi tanganiko poraie name am-sandiodode namen patibeaniko man-gen, anga iano kan-dikbee golponi bewalo kattarangko tariate seataha banoba namdapatna nanganirang bangen dongkugen poraisoenggiparang agane on-pachina molmolata.

### **Abigailni gimin kan-dike talatani:**

Abigail saksa man-e cha-begipa banga gamko Karmelo man-rikgipa Maon-o songdonggipa Nabalni jikgipa ong-a (ISam.25:2). Nabal Abigailko jikgipa man-na namen rasong gnangbegipa ong-a ine agana man-genchim. Maina Abigail saksa bimang nitoasan ong-aija namen gisik sengbegipa aro jeko dakna nanga obostako aro somoiko niroke segipani pilak jaksrapgijagipa kamrangko ka-na changbegipa ong-achim. Bebeko agangenchimode iandakgipa me-chikko man-na nengbea, haida iandakgipa me-chikkon Toe Skiani-o Solomonba agana, *“Gun gnanggipa me-chikko sawa manna amgen ? Maina uni dam muktana bate gamchatbata”*(Toe Skiani 31:10). Solomon sak ritchasni jikgiparangko aro Jikburung sak ritthagittamko basee nihaoba darang saksakoba uni jikgipani gisik gnangani gimin aro maiba mingnamaniko janapani sastroo dong-ja. Uni gimin gun gnanggipa jikgipako man-gijani a-selan Solomonni bon-kamgipa salrangara Isolni mitchigipa janggi tanganikosan janggi tangaiahama ine chanchiatmana. Maina gun gnanggipa me-chikrangko hajaloniko basee dakahama ine chanchiatmana. Toe Skianio indake agana, *“Banga deme-chikrang gun gnange dakaha, indiba na-a pilaknan bata”* (T.S.31:29). Abigailba saksa bimangni gita namen nitogipa aro gun gnanggipa me-chik ong-chongmota ine kan-dike I Samuel 25-oniko poraie chanchibewale seaha.

### **Nabal:**

Nabal saksa dalbegipa aro man-e cha-begipa mande ong-achim, indiba gisik matsramgipa ong-ja. Ua an-tangni gadangni kri maidakgipa kattako aro kamko ka-na nangachim ukon ma-sigijagipa, aro sakgipinnasan namgijako dakaigipa ong-ja indiba an-tangni be-en bimangna mamangba simsakgijagipa, skatang mamungkoba rakkiani gri cha-betbong-ringbetbongaigipa mande ong-a (ISam.25:36). Ua Kaleb ma-chongoni ong-a (ISam.25:3). Indiba namen nitogipa jikgipa Abigailko man-ani una namen patibeani ong-chongmotaha, maina una pilak naljokaniko uan on-aha. Nabal an-tangni pagipa ong-anikoba u-igijagipa pagipani gamko man-rikanio mamingba nokdangna simsak nirokani kamko mamingkoba chanchigija janggi tangaigipasan ong-aiaha. Jikgipa una namen ma-sichake nanganirangko dakchakaha aro una simsakaha ine nika, ongjaode haida uni janggi tanganio je kan-dikbegipa janggi tanganiko janggi tangahachim ua sal somoirango mangmangba kusi ong-e sal somoiko re-atna man-jawachimkon.

### **Daud:**

Daud Israelni raja ong-kujaengachim batesa ua salrango Saul rajani uko so-otna rikroromitingo somoisa ong-engachim. Daud unon an-tangko jarikgipa sak-600 manderang aro sipairang baksa namen neng-nikbee katjojoengachim. Unosa a-brio Nabalni mesrangko uni nitimgiparang nirikengon Daud aro uni sipairang mes jakna aro uko nitimgiparangna naljokaniko on-aha (ISam.25:15-16). Haida mesrangko nosto ka-na gita dingtang dingtang bobilrang re-bagenoba Daud jokataha, maina Daud an-tangan mes nirikgipa ong-ani gimin maikai mesrangna naljokaniko on-na nanga pilakkon u-iachim. Uni mes nirikmitingo matburungrang mesrangko nisina re-baoba uaragoniko ua Isolni bilo chelchakaha ine an-ching nika. Daud Saul rajana agana, *‘Nang-ni nokkol uni pagipani jakko nirikengachim; aro singho, ba mapil, re-bae jakoniko mangsako balangoa, anga uko rikangaha, aro uko doke uni ku-sikoniko uko jokataha; aro ua angko warachakoa, anga uko kusimango rim-e uko doke so-otaha. Nangni nokkol singho aro mapil manggniko so-otaha; aro ia bigil rasotgijagipa Philisti mande uaragoni mangsa gita ong-aigen maina ua tanggipa Isolni kotokrangko chonike ra-biaha’* (I Samuel 17:35-26). Daud mesrangko chelchakna aro naljokaniko on-na da-o adita sipairang baksa Nabalni mesrangko chelchakna mamingba bilgribeani dongjawachim. Nabalni nokolrangoni saksa Abigailna aganaha, *‘Nibo Daud...chingna nambeachim, aro chingaba namgijako dakjachim, aro chingni patalo dongmitingo uamang baksa dongenga dipet chinga mamungkoba gimaatjachim. Chingni*

*uamang baksa donge mes nirikmiting kakketo waloba saloba uamang chingna guare gita ong-achim' (I Sam.25:14-16).*

Daud mesrangko nikeba haida ka-saani ba uarangna simsakna sikani gisikan gapenggenchim, maina ua bi-sa intal mes nirikgipani kamko ka-baahani gimin jakko nikon ua indaken uarangna simsakna sikani aro jakna ka-saanian dongaiaha. Indiba Daud ua somoio neng-nikanirang baksa basakoba bi-sarangna aro ja-rikgipa sipairangna cha-aniko banoniko chu-ongge on-na man-pagen a-brio katjojoe burung bolgrimo Saulni sipairangna simsakbee janggi tangengani giminsa ua neng-nikaniko chagrongaha. Ua manderangna aro jattangna maming gimaaniko dakjahaoba Saul rajani ka-tongo mikbuanichi aro an-tangkosan isol dakatna chanchianichi Daudna nengnikaniko on-engachim. Unon Daud cha-anina cholrangko sandina nanganirang sokbaaha, jeon uni pilak dakna sigjjanirang okriani a-sel draatako man-aha. Okrimittingo maiko cha-ja, ringna sikmiting maiko ringnapja ingipa gita Daudni janggi tanganiara ua somoi chachao ong-engachim.

### **Nabalni Gisik Gri Dakani Daudna Daudna Saknaatani:**

Daud namen iachi uachi okrianina cha-anina re-roroe burung samring am-beoba man-jaha, aro ua bon-kamao Nabalona pante sak-10 ko watate adita on-aniko on-atpachina aganataha ( I Sam.25:4-8). Indiba Nabalni gisik gri dake aganchakaniara namen aiao inmananisa ong-skaha: *“Daudara Sawa ?Aro Jesseni depantea sawa ?”* Aro Nabal agankuaha, *“Indide anga angni cha-aniko aro chiko, aro angni mes kimil rasotgiparangna so-otgimin be-enko ra-e banoni re-bara uko uigijgipa manderangna on-genma?”* (I Sam.25:10, 11). Israelo songdonggipa pilakan aro Palistine a-songrango mangba Daud Goliatko so-otgipa Jesseni depante ine u-iachim, indiba Nabalni indake aganchakaniara namen aiao inmanbeani aro gisik gribeani ong-aha. Nabal namen gisik gribeani kamko aro ka-namgijagipa ka-sachakani grie an-tangni gadangni kri mamingko chanchigija dakaiaha.

Daud namen ka-onangbeaha, maina ua ru-uta salrangonian Saul rajani rikjojoe neng-ataniko man-engani gimin gisikni gita aro be-enni gita neng-bokpilengachim. Uni gisepon indakgipa mangnamgijagipa kattako knae chakchikna amjaha. Ua ka-onangbee uni jarikgiparangko tonual ra-e Nabalni pilakrangko aro Nabalko so-otna ine mande sak-400 ko rimbite aro sak-200-ko uamangni gamrangna dongrikate chakatangaha (I Sam.25:13).

### **Abigailni Gisik Gnange Dakani:**

Nabalni nokolrangoni Daudni uamangko nisiatna re-baenganiko knasoaha, aro uni giteltang Nabalni jikgipa Abigailna kattako aganeaha, maina ua nokkol Abigailnan segipana bate uan indakgipa obostao maikoba dakna man-gen ine ka-dongbatahakon uni giminsa joljol uonasa katange aganaha. Ua kattako knae mamungdakeba segipaona joljol re-ange katako aganejaha, haida uni segipana ua kattako joljol aganeode segipade chanchininggija maikoba gokani kamko dakgen ine ua ma-siengenchim. Aro ua mamung dakeba indakgipa somoio segipaona re-ange uko matnangjaha. Maina segipanaba ua baditan ka-saenggen, Toe Skianio agana gita gun gnanggipa me-chik, *“Ua an-tangni janggi tanga dipet Segipana namgijako dakgija namako daka”*(TS.31:12). Da-o ian namen Abigailna kenbegnigipa aro jajrengna nangbegipa ong-engachim. April jani bon-angachibara saliramoni andalbegipa aro ka-namgijagipa aram saksan burung bolgrimko re-angenggipa me-chikni kosako simdapenga gita ong-pilengachim. Daudni chadrapo mai obosta ong-genchim uarangko chanchisoeba namen kenbeani aro anskitpile ka-tong moani ong-aha. Indakgipa somoio ua chadenge jadasike sko rim-e kni a-brite au, au chrikprete grape dong-aijaha. Ua bakan aiao inmangipa kamko dakna tarake chakataha, Toe Skiani 31:17-o agana gita, *“Ua an-tangni kangkareko bilchi kaa, Aro an-tangni jakpong-rangko bilakataha”*. Abigail kattako knae namen kenbeoba ua gisik senge dakna an-tangni nokolrangko iachi uachi pilak nanganirangkon dakchina agantokaha. Sakoba barichi watataha, sakoba bakraona mesrangoniko mang bongako basee mobae den-e tarie songchina aganaha. Sakoba haida draka bitchirangko tarichina ge-etaha, sakoba pitarangko dakchina ge-etaha, indaken Abigail pilakon dikdiksani gisepo chanchie aro namen jaksape dakaha.

Pilak tarigiminrangko ra-chimongaha, aro uarangoni bakbak pita dot-200 aro draka bitchi bigil basing te-2 aro kike tarigimin mes mang-5 Aro akke joa don-5, aro draka bite chokchim-100, aro dumbur biteni kaprang-200 iarangko ra-e gadao gataha. Aro uni nokolrangna aganaha, *“Angna skang re-angsobo, nibo anga na-simangni ki-sango re-gen”*. Ua rakbegipa kamko chu-sokatna an-tangko nokni skotonggipa gita segipani mamung dakchakaniko bi-gijan re-chakatangaha.

Adita a-briraragipa biaprangko re-angengachim, uni re-angmitingo uni kenanirangni a-sel uni rangsitani bibaragon haida u-ipilmangenchim. Da-o Daudko grongahao una mai ong-gen, Daud uko ka-sachake ra-chakgen ba ka-namgija daken uko nisiatgenma uni gisikrang tom-tomjaengachim aro uni ka-tongo an-sre moanian komijaengenchim. Ua maiko dakgen uarangkoba chanchiroroe re-angachim, ua an-tangni cholonko maidake Daudna mesokgenchim uarangkoba kattarangko aganania aro una dangdikanio mairangko maidake dakgenchim chanchiroroangengachim.

Apalbegipa a-bimandu basakoba rong-brakraragipa a-brirangko songreanirang kenbegnigipa ong-ahaoba ua jeo Daud donue dongengachim ua biapona sokangaha. Abigail ta-raken gadaoni ong-onaha aro re-ange Daudko grongeha. Unon Abigail gadaoni gongrake ong-onaha; aro Daudni mikkango tujole a-ao tugopaha, aro ua Daudni jao tujole inaha, *“Angni kosakon sasti ong-china, angni gitel. Aro anga molmola nang-ni nokkol me-chikni kattarangko knachakbo. Angni gitel anga nang-o molmola ia mangnamgijagipa mande Nabalni gimin gisik on-nabe; maina uni bimung gitan uan ong-a. Uni bimung Nabal, aro uo goka ong-ani gnan; indiba anga nang-ni nokkol me-chik nang-ni watatgimin angni gitelni panterangko nikjachim. Aro da-o angni gitel Jihovani tanga gita aro nang-ni janggini tanga gita an-chi ong-atani dosioniko aro na-a jaktangchi a-jak sokaoniko Jihova nang-ko rimrikaha. Aro da-o nang-ni bobilrang aro angni gitelna namgijako am-giparang Nabal gita ong-china”* (I Sam.25:23-26). Abigail ka-dongbee Isolni bimungo Daudna mol-molaha aro an-tangni una ra-bagiparangko Daudna on-tokaha.

Daud ia nitobegipa aro gisik gnangbegipa me-chikni an-tangko onatan baksa Jihovani bimungo mol-molaniko dakengon, uni silgrak gita rakbegipa ka-tong da-o tin-kagimin suurini sal ding-baon jronganga gita jrongangaha. Maina Abigail nitoasan ong-aija indiba uo gun gnangani namen ka-tong rakgipa me-asani ka-onangani somoio maidake dakna nangachim ua changbee dakaha, aro uasan ong-aigija ua namen ka-dongani baksa Isolni bimungosa mol-molaniko dakaha. Iano chu-gimik Abigail me-chikni gunko mesokaha, maikai ka-onangbegipa me-asani mikkango sachina aro simsak-nirokna nangachim changbee kakkete dakaha. Uaranga agreba Daudni mande so-ote an-chi ong-ataonikoba don-tongchina aganaha. An-tangni man-gninasan molmolaijaha, indiba Daudna kakket ramakoba mesokjolaha. Daud Saul rajani inditan ka-namgija dake una dakengoba uarango ua chakchike Nabalni banggija goka dakanina an-tangni tonualko de-na siahachim. Ia pilakon Daud nikatpile ku-chil mandal bibal me-chikma dambeni rinokbal ku-rangchi agane ka-sariri nitobegipa Abigailni dangdik sachianiko man-ahaon Daud ian angna da-alo Isolni watatgimin me-chik ong-a ine ra-aha, aro jikgipani a-sel Nabalko kema ka-aha. Tom-tome noktangona pilangchina Daud Abigailko watataha (I Sam.25:32-35).

### **Isolni Jak Nabalni Kosako:**

Daud Abigailko uni ra-baa cha-anirangko cha-mano tom-tome noktangona watatpilaha. Abigail nokona sokbapilaha unon uni segipa ringe cha-e agre peke dong-engachim. Uni gimin jikgipa una mamung ong-arangkoba agangija walode donaiaha, maina uni pekmittingo uarango agangenode mamung namgni dongjawa ine u-iachim. Pring seng-ahaoa ua mikselaha ine u-ie jikgipa una uni pilak Daudna dakanirangko mamung donuagri agantokaha. Unon uni ka-tong siaha aro ro-ong gita ong-aha (ISam.25:37). Ua nampiljaha aro salchikingni jamano si-srangaha. Maina an-ching Sastroo rong-talen nikna man-a je, Isolni jak uni kosako ong-aha (I Sam.25:38).

### **Abigail Daudni Jikgipa Ong-baa:-**

Daud jensalo Nabal siaha ine knaaha unon Isolko mitelaha, maina uasan nitogipa me-chikko watataniko on-e uni gisegrikaniko chel-ataha; aro Jihova an-tangsa bichalko ra-skaaha. Maina Isol an-tangan agana, *“A-jak soka angnisa Anga on-pilskagen Ine agangipako an-ching u-ia”* (Ibri.10:30). Daud an-tangni manderangko watate Abigailko an-tangni jikgipa ong-china okkamataha. Maina Daud Abigailni pilak me-chikni gun gnanganiko, changa-sapaniko aro uni inditan nitoaniko mamungsaloba uni gisikoni biba pile gimaangna man-jawahachim. Uni ka-tongko ningtuen Abigailni rinokgipa ku-rangchi balnapmanaha aro nitobegipa ku-chil-mandal bibalara uko miknapataha. Uarangan ong-aija mong-songbate Daudni nikanio ua me-chikara Isolni uona watatgipasa ong-a (I Sam.25:32). Abigailba jensalo ua kattako knaaha unon an-tang baksa sak-5 metrarangko rimbite Daudni jikgipa ong-na re-baaha (I Sam 25:39-42).

Abigail Daudko Israelo raja ong-china to nongaha aro uan bilakbegipa Goliat Palistine mandeko so-ote Israelna jokataniko on-gipa ine knamanenggenokchim. Uni gimin indita gisik grigipa mande Nabalko segipa man-e adita bilsirangna neng-skime gitchi nangkame da-osamamang jakgitel ong-ahaoba ua segipa gitalko

kimna mamungba jechakgijan re·baiaha. Jamano ua Dalbegipa Israelni rajani jikgipa saksa ong·pae Rani ong·e tom·tome mamungnaba sinte mangija janggi tangna man·aha.

**Bon·kame Agandapani:**

Ia golpoko poraiengon me·chikrangni maikai segipa baksa Kristian nokdangko dakgenchim angni niatbatani gita nika, indiba segiparangni maikai nokdangna simsakna aro me·chikrangni nanganirangko on·e dakchakna nangachim uarangkoba man·gope aganaha. Unigimin ian chadamberangnade mamingba nangeani dong·jawa ineba agana man·jawa, maina maikai Kristian nokdangko jikgipa segipa chu·ongnikgrikan baksa nokdangko dakna nangachim, uaranko skie ra·na nangchongmota. Bangbata jikgipa segiparangni gisepo me·asa aro me·chik ba jikgipa segipani gisepo nanganirangko u·ichakgrike dakchakgrikanirang namen komia, aro unigiminan ma·sisretani aro nokdangna neng·nikanirangba sokbaa. Uni gimin nokdang dakugija chadamberang mikkangchina skie ra·sona aro nokdang dakgimin ma·gipa pagiparangba maikai jikgipa segipani gisepo ka·sagrike dakchakgrike janggi tangna nangachim, an·ching Isolni kattachiko niate Abigail aro Nabalni nokdangoniko skie ra·na anga poraisoenggipa sakantiko ku·mongrimna katchabegen. Isol poraisoenggipa sakantina maiba mingsasik ra·bianiko on·china angni bi·a.

\*\*\*\*\*